

四庫全書

史部

欽定四庫全書

史部

平定兩金川方略卷十八至

員外郎<sub>臣</sub>顧宗泰覆勘

總校官原任侍講<sub>臣</sub>王燕緒

欽定四庫全書

平定兩金川方略卷十六

正月丙午桂林阿爾寨奏言臣等進取卡了業將

克期進勦緣由先行具奏茲於十二月二十七日

亥刻各隘官兵均密行調齊而卡了地方堅礮林

立山勢踈險在申末郭松之西南中隔一河必須

分路進攻俾三處賊番皆難接應始能制勝因令

總兵宋元俊等即於是日亥刻四路分兵一路派

都司李天佑守備陳定國帶兵進攻西向山梁碕  
卡一路派宋元俊同巴圖魯侍衛六十一叅領巴  
克坦布等帶兵由喇嘛寺傍繞道進攻郭松一路  
派叅領普寧等帶兵由西向山根沿河會取郭松  
並攻甲木一路派侍衛哈清阿同叅將薛琮等即於  
浮橋渡河由東面山根沿河直攻卡了二十八日子  
刻<sup>臣</sup>等親自督兵並令鐵保英泰預備往來策應  
時都司李天佑等帶領兵練乘夜潛赴山梁黎明

突出奮擊賊番於山上滾石放鎗自卯至巳乘賊人稍懈我兵一擁登山賊人不及進礮殺死二十名搶獲平礮十座大小石礮十一座石卡十七處哈清阿薛琮等順河直抵卡了賊番正在卡內放鎗拒敵截我進攻之路我兵奮力上登先據石卡賊見石卡已失大兵鼓勇直前并見甲木郭松兩路會攻聲勢愈壯賊番不能渡河救應悉行驚潰殺賊三十四名割獻首級三顆生擒四名搶獲平

礮九十七座大小石礮三十五座石卡三十一處  
卡了地方已全攻克至陣亡帶傷各弁兵分別照  
例恤賞嚴訊活口據供卡了番民多半調往他處  
現在寨內約有二百餘人今見大兵兩路來攻各  
自越山逃散我們因老幼被擒等語臣等將番婦  
幼孩賚賞出力土司至郭松甲木二寨中隔山梁  
二道賊人據山未潰現在宋元俊同侍衛將備等  
統領兵練嚴加圍困俾寨內水糧斷絕以期不攻

自破奏入

上諭內閣曰宋元俊著賞戴花翎李天佑著桂林遇有副叅缺出越次奏補其餘出力之滿漢官弁均著查明交部議叙議卹

上又諭軍機大臣曰桂林等奏攻克卡了情形深為欣慰所稱現派宋元俊等帶兵攻圍郭松甲木二寨斷其水糧以期不攻自破亦合機宜至所稱搶佔平礮九十七座大小礮三十五座石卡三十一處而所剿

殺之賊僅三十四名所獲祇番婦幼孩各二且訊據  
番婦供稱防守碉卡約有二百餘人雖據供番民多  
半調往他處防守但以現在賊衆而計以二百餘人  
防守一百六十餘碉卡每處不過一兩人似無此情  
理若以為賊人只守緊要之處其餘俱無人屯聚則  
彼多設空碉又復何為均不可解似尚非該處確情  
著桂林等查明覆奏再前此屢降諭旨令溫福桂林  
侯軍務告捷後即於章谷設鎮駐兵並于約咱及達



木巴宗等處派駐副將兼派員帶兵駐守革布什咱使打箭爐至巴朗拉一帶鎮營聯絡聲息時通土司境壤內得有官兵橫亘其中勢足控制不特左界之土司金川無由滋擾即在右界土司之與金川毗近者索諾木自亦不敢輕肆侵凌方為綏輯番夷一勞永逸之計溫福桂林務遵前旨妥協定議具奏

戊申桂林阿爾泰奏言

臣

等攻克卡丁及西山梁

碉卡併力圍攻郭松甲木茲郭松賊番見圍困甚

嚴水道已斷救援又難前進勢處窘迫隨于二十  
九日子刻奪圍奔逸我兵分頭截殺共斃賊番十  
三名滾巖死者七名攻得大小碉房十三座三十  
日黎明<sub>臣</sub>等復分得郭松得勝兵練由山根沿河  
逆流而上越過甲木直踞山嶺賊番見郭松已破  
勢孤力怯而我兵復繞道往截其後鼓勇直上佔  
據石上碉內賊番意圖衝突奔逸又經殲斃二十  
七名攻獲大小碉房三十八座所有郭松甲木地

方全行佔據其二處礮房擇其完整而勢居扼要者酌量派兵駐守其餘已盡行焚燬再相度形勢卡了東北有山梁數道排列堅礮據高臨下為我兵進攻要路且山溝之下俱有礮卡并聞卡了逃出之番尚有在此拒守者而甲木東北山勢陡峻與卡了東北各山梁僅隔一河賊入於山上放鎗滾石以阻我兵沿河進攻之路現在飛令宋元俊薛琮及侍衛將備等迅速分路攻奪併遣人由甲

木越山密行探道設法繞截如果有別路可通即  
便分兵進取務期迅搗賊巢奏入

上諭軍機大臣曰據桂林奏攻克郭松甲木情形連得  
險隘碉卡擬即乘勝迅搗賊巢甚為奮勉溫福前奏  
斯底葉安山口賊碉已經攻破統兵攻圍資哩諒亦  
計日可得從此兩路夾擊實有破竹之勢逆渠自可  
迅速就擒但須預為設法防截勿令其畏懼逃入金  
川又煩申討方為妥善僧格桑就獲後即當在軍營

嚴加刑訊凌遲示衆仍傳旨諭曉使諸番休目警心  
共知畏懼設或澤旺此時將逆子僧格桑擒獻亦不  
可稍存姑息寬宥蓋小金川乃內地土司豈宜如此  
跳梁梗命若澤旺擒獻逆子在官兵未進之前或可  
原於格外今賊衆竟敢抗拒官兵顯然叛逆不但僧  
格桑寸磔難寬即澤旺亦應緣坐駢誅之犯或念彼  
向為逆子所拘不能自主姑可貸其一死但不宜仍  
留小金川之地即移之成都尚恐其信息易通久或

滋生事釁莫若即將澤旺檻送進京派員沿途嚴行  
管束毋致疎懈至該處番衆則照黔省古州之例改  
作屯兵令其耕作自食不必官為給餉養贍仍移設  
同知一員駐轄之久則漸與內地編氓無異自可永  
除後患而自打箭爐至巴朗拉一路并照節次諭旨  
於章谷設鎮駐兵并於僧格宗達木巴宗等處酌設  
副將參將而約咱等隘則量設守備帶兵駐守使內  
地鎮營聯絡聲息相通且將土司地界從中隔斷是

我得控制之勢而金川弭侵伺之端方為一勞永逸  
溫福等于軍務告竣即行妥辦籌議具奏

臣等謹按僧格桑之惡逆跳踉罪宜寸磔而其  
父澤旺按律緣坐亦豈有可生之理乃

皇上猶念其為逆子所拘姑可貸其一死俾將來檻送  
進京不使別生事釁矜恕之仁與好生之德真  
有同符覆載者是以窮蹙出降之後尚復全其  
性命直使小金川餘孽蟠結勾連復為軍營大

患然後置諸典刑以洩神人之憤盖非

聖人始願所及矣

辛亥

上諭軍機大臣曰據溫福等奏接奉諭旨令將攻取巴朗拉時應賞給巴圖魯名號之侍衛章京等查明具奏茲查烏鎗章京瑚尼爾圖三等侍衛佛倫泰藍翎侍衛巴三泰三等侍衛新達蘇俱各超衆出力等語著加恩瑚尼爾圖賞給多卜丹巴圖魯名號佛倫泰



賞給扎勒丹巴圖魯名號巴三泰賞給寧多布巴圖魯名號新達蘇賞給僧格巴圖魯名號併照例各賞銀一百兩

是日桂林奏言竊

臣接奉

上諭今將金川頭人由何路來至軍營及宋元俊如何往金川曉諭索諾木之處據實覆奏

臣

查金川頭人

庸仲係自噶拉依由巴旺布拉克底革布什咱地

方前至草谷渡河經駐扎章谷官兵送交宋元俊

訊明進見臣當即曉以大義發還禮物并訊知索諾木仍在噶拉依其革布什咱地方俱係頭人等帶兵駐守至宋元俊去年八月中前往金川直至噶拉依索諾木弟兄出迎當經嚴切曉諭據索諾木等稱革布什咱一事係其頭人勾結土舍發兵而革布什咱土司咒死現有咒經可證本有仇隙因革布什咱土司咒死現有咒經可證本有仇隙因該土司業已被戕土舍始派頭人暫管該處地方

並不敢違犯

天朝元俊復加斥責該酋懇求施恩給賞正在籌辦間  
阿爾泰劄知現在宜先辦小金川元俊以兩酋狼  
狽為奸已非一日今若遽令撤兵退地則兩酋唇  
齒相依必致互相援助一時難以並舉非權為駕  
馭不足以安其心而緩其勢因諭以革布什咱係  
天朝土司必須衆土司公保一人奏明請

旨更替爾若能取齊各土司印結或可代求大人轉奏

該酋等叩頭承允元俊查口外土司受金川之累  
屢被欺凌斷不肯全行出具保結即或畏伊強橫  
勉強順從而彼處寨落甚多遠近不一往返稽遲  
俟至取齊而我兵進勦小金川已有成局彼時移  
師問罪合力會攻該酋自必望風歸命因即馳回  
章谷嗣據巴旺布拉克底報小金川求救金川現有  
截我後路之舉當遣千總崔文傑親至噶拉依偵  
知索諾木業已派兵該千總飭以現在令爾取結

代爾乞恩何得復行滋事祇須將印結取齊自有  
加恩之處索諾木隨稱不過派兵前往駐守地方  
當即停止查索諾木年幼無知尚知畏法俱係頭  
人等慫恿妄行是以自襲取噶布什咱以來該酋  
並未離巢均屬頭人等帶兵佔據等語伏思兩酋  
相為朋比侵奪鄰封今見大兵直取小金川該酋  
坐視不顧誠如

聖諭為理之不可解第番人貪利終有希冀奪地之心

宋元俊在川年久頗能取信諸番聞現今各處取  
結尚未齊全是以並無舉動但犬羊之性狡黠異  
常恐日久生疑必致另有他變是以臣前屢請添  
兵防禦茂紐東谷剛察章谷等處俾得多兵重鎮  
聲勢相連既可絕其窺伺之計即以消其要挾之  
心於善後事宜似覺易於辦理至於勦滅小金川  
後僧格桑如果竄入金川索諾木不即獻兇退地  
臣即統兵並進萬不敢稍涉因循奏入

上諭曰金川頭人甚屬可惡將來索諾木退地則已若必至用兵此輩皆宜勦殺不可漏網也

是日桂林阿爾泰奏言臣等現由卡了攻奪山梁並由甲木覓道進取第查卡了以前山梁數道隔梁俱係山溝其梁上溝中賊人設有礮了拒守相持兩日未能攻克臣等于初二日夜分飭將備等密帶兵練潛從卡了山後扳援而上攻取梁上賊礮黑暗之中賊人未及窺見比及知覺放鎗我兵

已至礮邊拋入火彈賊衆見礮中火起紛亂奔逃  
我兵自上追殺殲斃賊番十二名追至第四道山  
梁賊人放鎗救應山上合力固守我兵不能經過  
先行佔據山梁三道隨於隔梁排架砲位轟擊併  
令對岸甲木官兵沿河施放鎗砲晝夜更番攻擊  
俾賊人支抵不遑至初四日丑刻賊人于山上吶  
喊復沿山縱火臣等思賊番正當窘迫之時必係  
故作聲張以為脫逃之計然亦未敢輕動隨遣人



登高瞭望借山上火光望見賊人為數無多當即  
催兵直上奮力追賊卡內賊番逃竄被我兵追至  
殺死五名其餘俱從崖後奔逸我兵復據山梁二  
道前後共攻獲山梁五處大小礮六十餘座卡洞  
十七處兵練帶有微傷者四名臣等查此五處山  
梁俱係零星寨落詢之土人等云名登依噶岡工  
茹租烏札哇窠五處現就番音填注俟考証再行  
繪入全圖臣等親赴查看札哇窠山梁前係陡崖

該番等滾崖逃脫溝內尚有跌死賊番三名隔岸  
高山詢係阿仰地方俱有碉卡防禦隨飭將備等  
搜山覓路如實在無徑可通即當由甲木合力進  
取查對岸甲木地方前面尚隔有噶爾金山梁一  
道賊人據險設卡防守甚堅過此再轉東北山梁  
詢距達烏約有二十里現在督兵攻打噶爾金碉  
卡仍密探間道以便抄截東北山梁務期直取達  
烏迅速前進奏入

上諭曰必得美諾擒獲僧格桑方成大功也勉之

同日溫福阿桂奏言

臣

等查賊人所恃惟在碉卡用力

攻撲自不免傷損官兵故尋覓捷徑登山繞行最  
為上策但此一帶地方步步皆山處處險仄一綫  
羊腸之外不能盡有旁路可通賊匪奸惡必於要  
隘處所多築碉卡如臣等前在巴朗拉即探得有  
水晶小路灣可以繞過賊碉緣該處積雪甚深未  
經由此進剿及既得巴朗拉後經過山陰察看形

勢水晶灣所通之處必由賊碕之下當時若果取道於此不但官兵必被傷損且恐為賊番所截進退皆難臣等自抵達木巴宗而後屢訪捷徑如達木巴宗以南之瑪爾瓦爾濟以北之別斯滿皆有小徑可通資哩然均係緣崖狹徑僅容一人山勢陡峻兼之冰雪凝凍賊人又處處設立碕卡以備抵禦此次分兵三路攻得斯底葉安一帶堅碕進攻資哩實皆仰賴

天威官兵總崖梯嶺晝夜力攻始得至此且詢之鄂克什番衆皆稱自達木巴宗以西碉卡均經小金川增多修固全非鄂克什之舊又稱因乾隆十二三年攻剿金川每用大砲摧擊石碉近年于碉內排紮木植貼護石牆使砲子不能直透雙層今由資哩至美諾雖不過數十里但中經木蘭填鄂克什舊寨及路頂宗蒙固等寨多有堅碉去賊巢愈近則賊酋自衛其死防守愈嚴勢須逐節進攻未免

多煩兵力再查軍營砲位若鑄造三四千觔大砲山路崎嶇斷難運送且非二十日不能鑄成一位故現在鑄用之砲不過七八百觔每攻一礮必須用數百砲俟將次殘破然後官兵奮力擁上賊人或逃或殺始不能守臣等揆度情形須至圍困美諾時方可就地鑄造三四千觔大砲以資轟擊之用奏入

上諭曰賊巢愈近防守愈嚴此是必然之勢但當鼓勇

前進斷無畏難中止之理也

同日溫福五岱阿桂又奏言

臣

等督兵圍困資哩

寨落日夜進攻其南北兩山有賊千餘人於險峻處建蓋卡座抗拒官兵而資哩賊人皆竄入寨內藏匿不出看來此寨不過百十餘間中有二十餘丈高碉一座四面有十餘丈高碉四座寨落四圍皆砌石牆石牆之上有小碉總卡賊人從碉孔中施放鎗礮官兵自去歲十二月二十九日起連攻

七晝夜礮卡已摧毀大半而賊人連次來衝又皆被我兵擊敗因其所踞險固仍舊抵死拒守臣等現在晝夜攻勦由此至美諾地方雖不過五六十里而阻於山路險峻礮卡堅固力不能施臣等深為憤懣今將賊人各礮卡摧毀進攻不無稍需時日然各處搜捕一日之內總可殺死數賊看來賊鋒已挫必不能久持奏入

上諭曰攻擊礮卡不致損傷官兵自是行兵之道然亦



不可太遲我兵之力如何口糧軍器俱壯盛否

同日溫福阿桂又奏言臣等前因巴朗拉山勢隘  
隘是以於攻破之日酌留官兵四百名防守并將  
所有碉卡盡行拆毀但查巴朗拉之西自日隆宗  
以至達木巴宗各路可通最為緊要如不得日隆  
宗及達木巴宗非但巴朗拉必須嚴兵駐守即畢  
旺拉德爾密等處以及在巴朗拉以內之鄧仍山  
山神溝卧龍關狼達橋均須防其抄截臣等一過

巴朗拉即由日隆宗進抵達木巴宗所有畢旺拉  
德爾密各處防守之賊俱先逃竄現在糧石鉛藥  
臺站諸要務均以達木巴宗為總匯之地賊番以  
不能越過達木巴宗分兵截我後路惟是番地山  
徑叢襟官兵既奮力前進後路益當嚴密防範臣  
等已於達木巴宗派令遊擊一員帶領川兵四百  
名駐劄侯臣等攻進美諾再將留駐官兵減撤其  
自巴朗拉以東直至汶川口外草坡地方約有十

二三站處處皆有存運官糧鉛藥

臣

等亦經量情

形每站派駐官兵二三十名至五六十名不等似

不致稍有疎虞再查逆酋竄入金川之路

臣

等檢

閱地圖並詢問從賊境脫出各番人言美諾以西

在在與金川接壤其間相通之處甚多而南路自

深谷以至約咱皆係兩金川連界之處桂林現由

彼處進兵自能留心堵截至

臣

等西路兵行所經

尚係鄂克什舊境在美諾之東惟期剋日盡復鄂

克什舊地迅搗美諾則一面圍困賊巢一面即查探美諾以西與金川可通之路酌分官兵前往邀截使逆酋不致於漏網奏入

上諭軍機大臣曰溫福奏現在圍困資哩尚未得手賊人俱藏匿碉內施放鎗礮若銳於進攻恐兵丁或有損傷等語所見甚是資哩離賊巢甚近賊衆自必拒守官兵攻擊自不可輕率即稍遲時日亦屬無妨今早據桂林奏已攻得卡了山北山梁碉卡五處現

在攻取達烏攻得後自可即攻僧格宗該處亦逼近  
賊巢兩路夾擊賊首自更難於抵禦計書明阿王萬  
邦所帶之陝黔官兵將次可抵兩處軍營官兵續有  
增添聲勢愈壯且乘此新勝銳氣自必倍加奮勇勦  
擊賊寨無難但加兵嚴密攻圍絕賊水道糧道賊衆  
勢將自潰惟在溫福等相機勉力為之若僧格桑竄  
入金川而索諾木竟敢抗不擒獻必當移兵申討即  
令預選之健銳火器兩營勁旅迅速起程即或更須

添調隣省綠營精兵亦無不可果能併減金川實一  
勞永逸之計朕亦斷不惜費昨歲已撥餉三百萬兩  
解川備用將來再不妨再添三百萬兩現已諭戶部  
查議另降諭旨此時部庫所積多至八十餘萬朕每  
以存積太多為嫌天地生財止有此數今較乾隆初  
年已多至一半有餘朕實不欲其多聚若撥發外省  
公事動用稍減盈積之數亦屬調劑之一端將此意  
亦令溫福等知之

臣等謹按軍興旁午需費浩繁自小金川不靖進  
師申討

皇上屢次添撥帑項者誠慮一時遷就完事則將來又  
恐別滋事端勢必再為籌辦是省費而適以糜  
費也

宸衷獨斷不惜一時經用之繁為久遠奠安之計此誠  
聖人廣大之謨而不得已之心亦可仰見矣

同日

上諭軍機大臣曰溫福等奏攻取巴朗拉貴州綠營員弁既能奮勉出力自應一體酌加鼓勵全福何國柱均著賞戴花翎國興着賞戴藍翎至兩路軍營再着各寄花翎十枝藍翎十枝嗣後有似此奮勉者即着溫福桂林酌量賞戴仍附摺奏聞

壬子

上諭軍機大臣曰總兵牛天昇此次在軍營亦屬奮勉如從前未得花翎即着加恩賞戴以示鼓勵



同日

上又諭軍機大臣曰桂林等奏到土司圖內地名頗多舛悞未足為據番地名目大率本之唐古忒居多因令章嘉胡圖克圖逐一查對並用清字譯出詳註圖內寄交溫福桂林嗣後該處土音為西番字所不能通者並著詢明該處土人用清字對音一並更定具奏

平定兩金川方略卷十六

欽定四庫全書

平定兩金川方略卷十七

正月甲寅

上命軍機大臣曰昨溫福將千總韓世貴押送到京業經軍機大臣詢問亦無別情該弁前與小金川打仗被賊拘留此等微末武弁原不必責以大義自可無庸加罪著令回至川省仍交溫福隨營差委

丙辰桂林奏言

臣

查卡了東北山梁五道前隔懸

崖現在查探山徑並無可進之路若於此屯兵聚  
守恐致耽延隨將所有兵練即令侍衛將備等帶  
領渡河齊集甲木合攻噶爾金自初五至初七連  
日攻打賊寨據高臨下放鎗滾石拒守甚堅至初  
八日午刻我兵漸次逼近賊寨在山上約有六七  
百人併力拒敵我兵仰攻迎殺自午至申殺死賊  
番五十餘名併鎗斃紅衣頭目一名賊番驚惶搶  
去旋俱陸續奔逃我兵鼓勇直追過噶爾金地方

賊番齊至前面山梁半山救應鎗石乳下悉力拒  
守時已日暮隨令將弁等將噶爾金先行佔據共計  
得大小碉房十一座石卡七處我兵亡陣兵練三  
名帶傷三十餘名分別重輕照例卹賞臣查噶爾  
金賊番雖經失利但所聚尚多當飭官兵加意防  
範是夜亥刻賊番果來攻奪我兵施放排鎗奮勇  
迎殺賊番知有備禦仍逃回東山梁屯踞於山上  
滾石放鎗我兵難以徑過臣現在督同侍衛及鎮

將等架礮轟摧晝夜攻打以期迅速前進至由甲  
木山後統路進攻之處前據探路人回稱山後小  
路賊人分佈隘卡防守甚密不能統越臣現與宗  
元俊密為商酌於兩面附近山傍凡稍有人力可  
通并有可以越統達烏直抵僧格宗之路先為偵  
探以便設法分路進剿奏入

上諭曰欣慰覽之益當奮勇前進想續增之兵亦當至  
營軍勢加勁自當尅日擒獲克渠俾待捷音也

戊午溫福五岱阿桂奏言臣等現在資哩圍住賊寨一面派委識路之人各處察看路徑一面盡力轟擊數日之間雖多毀壞但賊人碉寨俱係用石砌成甚為堅厚軍中礮位皆湏酌量移運所鑄者止六七百斤不能迅速摧殘日間塌地之處賊衆揣知夜間放礮無準乘隙修補且資哩地近美諾失此要隘即難以支拒大兵是以盡力死守今我兵所登南北兩山連絡二三十里分地日夜攻擊

已經十有餘日現在探路人回報達木巴宗對面  
迤南有本布爾桑岡一處過山即可抵美諾又資  
哩北山之後由色布色爾地方可統至鄂克什官  
塞等語臣等查本布爾桑岡即與從前董天弼由  
甲金達所取牛廠地方相近後失牛廠未能復由  
此路其間有三大岡積雪嚴凝亦甚嶮要如能越  
此三岡順山前進不過三四日可至美諾桂林已  
過卡了若由此派兵進剿已近桂林進兵之路一



同攻取美諾亦覺得力至色布色爾在北山之後  
深林密箐險狹難行若由此路遠行可至鄂克什  
官寨但臣等現在三面攻打資哩兵力僅足敷用  
並無餘兵可由本布爾桑岡遠路前進查陝西兵  
一千名甘肅兵一千名據報于本月十五之前後  
可到臣等公同商議此項官兵不必俟到資哩預  
計其將抵達木巴宗之日即派巴宗魯侍衛章京  
等前往帶領由本布爾桑岡一路前進其進色布

色爾之兵擬于北山官兵內酌量抽出臣五岱前  
往統領仍督率餘剩之兵力攻資哩務期盡力南  
北兩山之賊直抵美諾又攻擊賊寨須用大駝臣  
等遣人將向陽坪所存銅斤及應用物料趲運前  
來趕緊鑄造庶為得力

同日溫福阿桂又奏言本月初六日據資哩南山  
梁總兵牛天昇拿獲賊犯一名沙拉押送前來臣  
等嚴加訊問據沙拉供稱係金川勒烏圍人因小

金川遣人到索諾木處懇求出兵索諾木初時不  
允及屢次懇求索諾木派九寨番人約七百餘名  
前來救援索諾木發兵時分付帶領頭人等只替  
他把守山梁不可明與大兵打仗等語臣等即將  
沙拉於軍營正法查兩金川狼狽為奸情狀久著  
厯據各番人供稱聞有出兵助逆之事始無據確  
今則顯然是索諾木之黨惡助凶其情實為可惡  
勒減小金川後自不得不加兵懲創但據該犯稱

索諾木不令明與官兵打仗自尚知畏懼臣等此時惟有迅速攻進美諾如索諾木即將所派之兵潛撤歸巢而所佔革布什咱地方全行退出臣等臨時再當審察情形請

旨遵辦奏入

上諭軍機大臣曰溫福等奏現在攻勦資哩賊衆悉力拒守今已覓有間道擬俟續調兵到分路進攻等語所辦甚是看來資哩為賊人門戶而桂林一路所攻

僧格宗亦係賊之要險且俱距巢甚近賊衆抵拒自必益堅今既兩路夾攻而續調官兵日漸增添聲威更壯自可尅期攻克進勦美諾但恐僧格桑聞知各處險隘已失竄入金川如索諾木遵檄縛獻并退還革布什咱侵地軍務亦可告竣朕本意原不欲窮兵遠涉也設或索諾木黨惡鴟張則執難中止自不得移兵進討即當迅速奏聞早發京兵前往合力集事因思金川巢穴專恃勒烏圖噶拉依等處負隅拒

守所有官兵進勦之路理應預為酌籌庶省臨期更煩措置從前進勦金川曾分兩路進兵經略傅恒由喀爾薩爾一路提督岳鍾琪等由丹琪一路將來若須進勦金川仍當由此兩路分進溫福桂林各統一路官兵犄角夾攻使賊左右受困方可制其死命其中道路遠近險夷山川形勢阨塞及作何彼此連絡策應之處溫福等宜早為留心部署務期胸有成竹以便臨時調度悉協機宜但賊番等心性狡黠其探

訪消息較內地尤為便捷此旨只應溫福桂林阿桂  
等數人密為籌度其餘軍營將弁等並不宜令其預  
聞以防洩漏即臨進兵時亦勿稍涉聲張使賊衆猝  
不及防庶為允協至所訊沙拉供詞說金川曾經發  
兵七百相助小金川是其與僧格桑狼狽為奸情罪  
實為可惡但此時且不必提及若僧格桑逃至彼處  
即為申明助惡之罪使其擒渠自贖倘竟頑梗不率  
底匿逆首則聲罪致討索諾木更無可狡飾至沙拉

所供不可明向大兵打仗之語亦不足信賊酋既已  
借兵與小金川其打仗與否何從辨別摠之擒獲拒  
拒賊番不必別其孰為大小金川槩與駢誅再從前  
征勦金川時正議直壓山梁搗取賊窠因卽卡窘迫  
投誠遂以免降完局今若征討金川必當照現辦小  
金川之例勦平其地永絕後患不可稍有遷就了事  
之見

同日溫福五岱阿桂又奏言正月初九日馬彪帶



領黔兵二千佔據資哩北面山梁東西三十餘里  
俱派將備扎駐其山梁對過又有高山係通鄂克  
什舊寨之路賊番五六百名在彼佔據初八日夜  
亥刻賊番乘風大天黑從山溝密箐中偷上高坡  
分為四路衝擾都司黃壯略守備王廷玉營盤其  
時黃壯畧先聞王廷玉處有驚帶兵前往彼此鏖  
戰賊即潛逃而侍衛巴山泰等聞黃壯畧處亦有  
賊來帶兵應援合力攻擊殺死甚多餘皆從山坡

逃逸檢點軍器黃壯畧隊中失劈山礮二位王廷  
玉隊中失劈山礮一位臣等查馬彪此次帶兵從  
小路攻奪碉卡佔據山梁官兵露宿已歷二十餘  
日雖不免稍有疲乏但既分兵防範理應加倍嚴  
密且礮位尤關緊要豈容遺失臣等營盤離該處  
往返五十餘里當即派員前往確查該鎮所報是  
夜打仗追殺賊人情形尚屬確實駐卡處所亦並  
未移動尺寸但該二員現已遺失礮位請

旨將黃廷畧王廷玉等交部嚴加議處至總兵馬彪係統  
領大員亦應請

旨交部嚴加議處臣等調度不善亦難辭咎應一併交  
部察議奏入

上諭內閣曰軍營礮位關係緊要該都司等雖夤夜攻  
賊竭力勦攻但不能守獲礮位致有遺失自有應得  
處分黃壯畧王廷玉等著交部議處其總兵馬彪駐  
守之處離打仗地方尚遠且聞信親往督勦尚屬奮

勉加恩勉其議處至溫福等大營則相距更遠一時難以查察溫福五岱阿桂俱不必交部

同日溫福阿桂奏言臣等查雅滿塔爾在土舍中素稱勇幹今令隨營行走尚為出力該土舍前於平定金川後經四川總督策楞等給與土守備職銜原有委牌執照此次被圍遺失今奉

旨加恩臣等當即傳雅滿塔爾宣示

恩旨並給委牌雅滿塔爾已叩頭謝恩祇領再查此次

瓦寺土守脩薩郎雍中係土司之姪行走亦為奮  
勉臣等亦已給與土都司職已示鼓勵奏入

上是之

同日溫福阿桂又奏言臣等遵查董天弼一路官

兵于二月十五日進抵達木巴宗而臣等先於十

三十四等日晝夜攻勦巴朗拉攻取碉卡擒戮多

人賊番度力不能支因將木耳宗達木巴宗等處

防守之賊撤往抵禦維時董天弼從蒲松岡小路

前進在達木巴宗對河南山梁壓下是達木巴宗之迅速解圍實由于此至所得礮位臣等以董天弼在牛廠有遺失礮位之事即訊問董天弼等令其認識據稱木坪軍營所用劈山礮遺失四位此次所獲之劈山礮即係從前所失復將兩鐵礮逐一驗看小鐵礮似內地威遠礮而更小或係番人所造其九節礮實非番地所有臣等近居逸出人供稱小金川曾向金川借礮三位金川現在索

取等語此鐵礮或係金川借來之礮亦未可知俟  
拏獲逆酉方得其情節至鄂克爾土司之色達克  
拉解圍以後察看情形口食不繼所有山田曠廢  
已久各番籽種全無不得不量加撫卹是以<sub>臣</sub>等  
奏明約借給土司人衆口糧並飭司道酌借籽種  
俾及時之耕種<sub>臣</sub>等即向該土司諭以爾鄂克什  
為小金川佔奪特發大兵勦救在

天朝用兵勦賊百萬金錢尚所不計何惜爾數石之糧

乎但體制所關斷無養贍土司之理爾等番人宜自行料理或即在軍營中擔水斫柴亦可覓食一俟賞給籽種到來即趕種春田以資接濟奏入報聞

同日溫福又奏言查藍領侍衛哈爾玖帶領成都滿洲兵四十名至達木巴宗將賊殺退續攻本耳宗亦出奮勇奏入

上諭曰哈爾玖著授為三等侍衛



辛丑桂林奏言查噶金背後有橫亘山梁之一道  
山勢陡險前曾差人由甲木翻山查探據稱山後  
雖有小路賊番屯聚甚多防守甚密不能達越等  
語隨嚴飭格爾金等處官兵加意防備臣督率侍  
衛並將備等於本月初九初十等日悉力攻打噶  
爾金之東山梁茲於十一日子刻賊番分路潛來  
一由扎哇窠後山林內來攻我兵所修梁上木城  
一由東山梁直撲噶爾金卡座一由噶爾金後山

梁潛下意圖偷營盤我兵分頭抵禦自丑至卯將東山梁及扎哇窠後山賊衆盡行擊退因噶爾金後面山梁賊番甚衆我兵奮勇迎殺彼此相持互有損傷比及天明賊見我兵直前掩殺復添兵接應據高臨下滾石放鎗山徑逼仄難以仰攻現在架礮轟摧以斷賊番下山攻奪之路十二日未刻賊番復由扎哇窠背後遶山來降官兵合力截殺至酉刻即行擊敗割獻頭人首級一顆殺死賊番

十九日我兵帶傷十六名十三日辰刻臣督率鎮將等攻取東山梁碉卡而梁上賊番拒守甚固鎗石亂下自辰至申未能攻克臣思小金川正當三路夾擊之時又值屢經失利何以轉能集聚多人或日間對仗或潛夜偷營必有逆黨添兵之事因密飭熟諳土兵於對敵時分路留心瞭望據稱大半金川番衆并見有金川頭人額諾等是索諾木之暗為幫助已為顯然必得大挫其鋒痛加殲戮

彼賊者知所畏懼始足以戢其桀驁之心臣現飭將脩密帶官兵潛藏於各山附近之隘要處所俾賊番夜墮伏中以便斷其歸路盡力勦殺仍督率鎮將侍衛等一面架礮攻擊噶爾金後面山梁一面設法攻取山東梁碕卡以期速進查索諾木敢於助惡與僧格桑狼狽為奸將來自須併力殲除但今南路既已幫兵西路諒亦必有徃助之事已飛咨大學士溫福提督臣阿桂預為籌備并孔致

阿爾泰於章谷等處嚴加防範一面催令在途貴州兵二千名兼程速赴軍營以資策應奏入

上諭軍機大臣曰桂林奏十一十二兩日賊番俱統山梁而來潛圖偷劫經官兵奮力擊敗並派兵設伏邀截所辦俱合機宜至所稱對敵時令土兵留心瞭望大半皆係金川番衆并見有金川頭人額諾等語昨者據溫福奏拏獲賊犯沙拉訊係金川勒烏圍人并供金川派兵約七百餘令頭人帶往相助小金川等

語是兩路營俱有賊兵自山梁潛來偷奪如出一轍  
必係金川之人暗為指使其情甚為可惡金川賊番  
既為小金川出力抗拒或于兩路賊兵截我之後以  
阻臺站餉道皆不可不防今陝甘兵已據溫福奏正  
月十五日可至軍營而貴州兵亦據王萬邦報稱十  
二月二十六日已抵成都正月二十左右即可至桂  
林處是兩路續添官兵聲勢甚壯正可合力夾攻搥  
穴擒渠并各選派勇幹弁兵在後路嚴密防禦毋致

賊人逞其伎倆最關緊要至我兵現攻之資哩僧格  
宗兩處俱係小金川要隘金川助惡之兵更由何路  
徑赴賊寨則賊衆潛趨美諾之來路恐即為逆酋將  
來竄往金川之去路不可不訪問明確預為伏兵堵  
截以防僧格宗之駭走方為妥協至於索諾木竟敢  
顯然助惡更不必慮其知覺生疑此時若仍佯為不  
知轉使賊人隱為得計自應作為桂林之意派明幹  
之人前往金川檄諭索諾木以僧格桑抗違教約侵

佔鄰疆及至官兵壓境尚敢率衆抗拒罪在不赦至爾金川本係無罪之人即與僧格桑誼屬姻親原無緣坐之理且自爾父郎卡投誠以來承受大皇帝恩惠二十餘年今我兵攻勦小金川擒捕逆犯罪有所歸與爾金川無涉乃昨在卡了山梁望見小金川賊衆內竟有爾金川頭人在彼率衆相助而大兵所獲賊番沙拉訕係爾金川之人并供金川派兵七百頭人二名往助小金川之語則是爾金川竟顯與小金



川黨惡甚為非是並據沙拉供爾諭頭人止令看守  
山梁不令與官兵打仗今看此光景爾兵既至小金川  
即屬助逆是爾自為詭狡其實至愚爾索諾木悖理  
妄行至此非惟無益于人并且貽害于已實為自取  
罪戾本督部堂念爾父即卡向來恭順奉法不忍遽行  
聲罪致討特差員弁賁檄傳諭爾索諾木奉到檄示  
之後著即派傳小金川之眾迅速撤回並將所佔華  
布什咱之地盡行退還或僧格桑畏罪逃入金川即

行擒獻則平定小金川以後原可不波及金川仍得  
保守土境樂業安居爾若執迷不悟則勦滅小金川  
即移兵問罪現在各省精兵數萬已集軍營並選發  
八旗勁旅數萬合力擊攻小金川即爾榜樣官兵所  
至勦洗無遺彼時悔無及矣特為明切檄諭利害爾  
自擇之如此傳檄既可使其知所驚畏並可覘其舉  
動若何以便相機辦理但所遣之人須擇曉明大義  
勇幹可任令其前往于事方為有益如索諾木敢于

抗違則難中止又莫若早為籌辦桂林即當據實守  
奏便可令京兵迅速起程赴川及早集事計汪騰川  
所帶之添調陝甘兵三千名二月初旬外亦可至理  
林軍營足資攻勦金川之用若如桂林前此之奏取  
停止又將另煩籌畫桂林此次辦理軍務措置俱行  
合宜惟停止陝甘兵丁一節未為得當今亦不深示  
也至章谷一帶既已扎致阿爾泰嚴加防範甚中華  
綦其餘有似此應行防守之處並宜一概留心 即

臣等謹按小金川自作不靖不得不聲罪致討得  
以綏荒服至如金川壤地毗連苟其各安住川  
退地回巢則我

皇上如天並覆原可赦其已往而予以自新與鄰近各  
土司共享昇平之福今恭讀

上諭令督臣等反覆檄諭董勸兼行詳悉深至終不忍  
不赦而誅迨至擴猗不馴始終怙惡

天兵直壓賊巢獲醜獻俘此實逆豎之自取殄絕而仰

惟

大聖人之因物付物又何嘗稍有成心也

平定兩金川方略卷十七

欽定四庫全書

平定兩金川方略卷十八

二月丙寅五鼓奏言

臣

帶領官兵於正月十七日

攻取北山頂由谷口循山梁至北山頂相隔七十餘里量其要隘俱分兵佔住擬於十八日將溝內藏匿賊匪盡行勦除乃十八日晚伍什哈達來稱奉將軍令爾若不能取此山頂即以軍法從事

臣

因添兵二百五十名交與副將色倫太及伍什哈

達併諭以色布色爾以東已取大碛地方有都司  
徐大勇帶領兵八百五十名在彼扎住汝等即與徐  
大勇合兵駐守併截殺山下逃竄賊人又使告知  
各駐守北山之總兵馬彪令將所有兵一十二百  
名內速撥三百名前來旋據馬彪覆稱若如數撥兵則此處  
惟剩九百兵勢難守禦不能遵照等語臣復兩次遣人諭以  
此處不必駐守可將所屬兵一千二百名即速帶來臣隨帶  
兵五百名赴徐大勇所守之處先將勁兵給與統國興令其先行九日



勿剌徐太勇所守處見十里外高峯已為賊番佔據  
烏什哈達佔據小山之頂賊番見國興帶兵  
將到即棄山頂下逃臣隨派瓦寺及鄂克什  
土兵三百餘名由賊番後面追殺又令彰霸  
額森特帶領兵由西山下堵禦截殺乃當土兵  
追殺之時賊番即由伍什哈達處敗逃而伍  
什哈達不帶兵掩擊轉將臣所調土兵三百  
餘名止住往取無賊空卡以致賊番知西山

下有兵堵截即由伍什哈達所駐山梁下遁去是伍什哈達不遵軍令任意帶兵而副將色倫泰等不諳地利又於徐大勇駐兵之地相去十五里以致與賊者連次接仗雖經殲賊十數名而副將色倫泰陣亡兵丁陣亡者亦二十餘名受傷者將及五十名查馬彪逗遛怠緩伍什哈達不遵飭諭致損官兵請將馬彪伍什哈達革職留在軍營自脩資斧効力贖罪以為炯戒

同日溫福五岱阿桂奏言臣等將先到之西寧兵

一千名并駐北山之貴州兵及瓦寺等土練兵三

千五百名派總兵馬彪副將富紳色倫泰及巴圖

魯特衛等分帶臣五岱統領於十五日起程由北

山色布色爾一路前進臣溫福阿桂帶領餘兵仍

用礮轟擊資哩賊寨又預兵四百名密約定五岱

佔據北山之頂由彼處循梁下壓佔據資哩對面

大峯臣溫福阿桂即發所備之四百兵攻取資哩

寨落

臣

五岱於十五日晚帶領官兵因山險雪大

須越五道山溝始可上對面陡壁佔據山梁倘被賊人知覺即難登躋連夜攀附遙行竟於天未明時已至對面陡壁之頂兵丁僅到千名餘於十六日戌刻方始到齊十七日卯刻令侍衛彰額額森特伍什哈達等進攻山梁卡內賊人賊衆潰敗俱從峯頂滾下共破五十餘卡得礮七座殺賊四十餘人相度山形給與伍什哈達兵二百名佔據山

頂

臣

溫福阿桂於是夜戌刻見伍什哈達處舉火

即令預備四百兵進逼賊寨正在放鎗擊打忽見

伍什哈達帶兵下山詢云已佔山峯復被賊人奪

去

臣

溫福等訊以汝在山峯舉火軍中明明看見

又何須送信即送信又何必帶兵自來伍什哈達

驚惶不能對

臣

溫福即欲將伍什哈達叅奏伊深

知罪戾願帶原兵復取山峯否則自甘治罪

臣

溫

福仍令其由五岱處添兵攻壓

臣

五岱於十九日

再撤北山之兵五百五十名給與侍衛富音保章  
京巴彥泰等上山協助伍什哈達復取山峯已將  
在卡賊人全行勦洗至藏匿樹林之賊每夜潛來  
驚擾俱被官兵擊退其十九日子刻賊衆約五六  
百人三路潛進被侍衛三達爾都司富敏泰守備  
袁國璉等帶兵橫截殺死賊人甚衆擒獲二名其  
受傷殺死之賊皆于昏黑中拖曳而去夜間雖不  
能辨明數目而早間審視拖走之處一路血跡甚

多再十八日夜飭侍衛三達爾等帶領取德壘角  
二小寨殺賊二十餘名燒毀兩碉兩寨房屋二十  
餘間臣等俟將南北兩山抗拒賊衆全數勦除即  
奪取資哩寨落以便籌畫前進奏入

上諭軍機大臣曰據五岱叅奏伍什哈達馬彪不遵號  
令請一併革職令其効力贖罪溫福摺內又稱伍什  
哈達私離汛地卽欲辦理伍什哈達遂帶兵復往佔  
據山峯等語伊等不遵將軍號令固不得謂之無罪

但溫福即欲辦理伍什哈達亦覺過當伍什哈達理應看守所佔之處遣兵寄信溫福不應將兵帶回此其罪也但伍什哈達從前亦曾攻碉奪卡今棄山岡而能復行佔據亦可以抵罪伍什哈達馬彪俱着加恩革職留任令其出力自贖溫福平時口吃在朕前奏事尚不能達其意性又頗露急躁官兵不知其如此必謂將軍性暴兵衆難堪又因不能即克地方中心煩躁不論山險雪深一味摧迫官兵如此辦理



恐失軍心不可不戒也再行軍之道固當嚴肅亦應  
審擇地勢量能而後進若不惜兵力不論地之險阻  
惟知勇往直前恐於軍事反無所益數年以來凡臨  
陣退縮者朕必治罪然於山險雪深難於進攻之處  
並未嘗不愛惜官兵惟令催促前進也五岱阿桂皆  
係舊人從前皆同溫福歷練行陣二人亦當將此情  
節婉勸溫福再此時書明阿張大經所帶之兵諒亦  
陸續將到此兵到時軍威愈盛爾等其一乃心力共

圖滅賊速奏膚功

臣等謹按軍行紀律不可不嚴而撫卹之意不可不至我

皇上整飭戎行退怯者必加懲創至於山川嶮峭冰雪

凍凝又未嘗不

鑒其情形曲加體恤是以此數年以來

天兵所至戰勝攻取拓地二萬餘里

武烈光昭垂輝鐘鼎茲因將軍過於嚴切諄諄

曉諭示以撫綏駕馭之方復

命同事之臣時為規勸

聖明委任成全之至意固已溢於

言表而日後挫失情形

大聖人已炯照機先矣

同日溫福阿桂又奏言竊

臣

等於正月初四日接

准桂林咨稱原調陝甘官兵業經調赴西路其貴  
州兵二千名原擬撥赴甲金達接濟現在南路急

需添兵進勦所有黔兵擬先撥赴約咱軍營倘西  
路有需加添之處請於續調之陝甘兵三千名內  
酌留應用等因臣等已飛飭帶領黔兵鎮將星馳  
前赴約咱計此時已全抵軍營至臣等與桂林道  
路雖分辦理原屬一事所有續調之陝甘兵三千  
名雖經桂林咨商撥補西路而臣等以南路需兵  
稍急自應多為接濟是以未經酌調茲據軍需各  
司道稟稱陝甘二千名由廣元入川到省時即令

其速赴南路其甘涼兵一千名另起行走仍由階  
文畧陽入川計程已抵松潘距西路軍營甚近似  
應就近調赴西路等語臣等查添調官兵總須按  
其行走程期以實能迅抵軍營備用為要今臣等  
現在攻圍資哩桂林亦將行抵僧格宗兩處距美  
諾均不過數十里指日可以會合此項甘涼兵一  
千名既已行抵松潘若令其繞赴約咱必須回至  
成都再由雅州打箭爐等處前往紆迴一月之程

行兵既不免稍疲于事亦屬緩不濟急應照各司道所稟令其逕赴鄂克什軍營不過月內可到俟會合時仍令脩桂林軍營調遣臣等現在咨送桂林并飭知軍需局遵辦再查前此原調陝甘兵三千名其西寧固原兵三千名均已先後抵營至總兵張大經所領陝西兵三千名臣等前亦曾撥往南路嗣後桂林處已調貴州兵二千前往是以此項陝西亦從木坪甲金達一路前來不可不抵軍

營奏入

上嘉之

同日溫福又奏言現在兩路官兵屢經攻進雖賊巢愈近聚守愈固逐節攻催未能勢如破竹然賊人伎倆不過如此臣揆度事機小金川自可指日辦竣勦定之後所有善後事宜臣身承重任早夜籌畫惟有于小金川境內擇其扼要地方設鎮駐兵控金川隅截內外方為一勞永逸之計茲復疊

奉

諭旨令于章谷僧格宗等處酌設重鎮協營分兵屯駐

臣查僧格宗係小金川地方章谷亦係通小金川

之路將來設鎮分布各營應合小金川之全境并

審察與金川接壤之地何處最關緊要以定營制

之輕重額兵之多寡容<sub>臣</sub>與桂林會合後往復熟

悉自可得其要領總之各番部強弱既殊其侵欺

鄰境即為抗拒



天朝之漸小金川地方若不設重鎮不但小金川舊地  
金川易於蠶食即明正木坪鄂克什各土司亦必  
被其侵陵轉瞬又生遺患如果有官兵鎮守經理  
協宜制防嚴密自可永綏荒徼即或狼性難馴妄  
思自逞而沿途各鎮犄角已成亦可隨時撲滅臣實  
可信其歷久事定至金川索諾木助逆顯然自有  
應討之罪其所佔革布什咱地方將來如何退出  
必須臣與桂林會合後酌看情形籌定全局奏入

上諭曰此時正以勦小金川為要餘俟成功再圖可也

同日溫福阿桂又奏言臣溫福於上年十一月內

據松潘鎮福昌稟稱三稜谷土司情願派調土兵  
隨同勦賊是以派委松茂道查禮維州協副將五  
福前往各土司處酌派土司隨同書明阿所帶固  
原兵由曾頭溝一路進發今查禮五福稟稱據梭  
磨從噶克卓克采土司稱我等土司當日曾經出  
力陣亡者亦多今人戶稀少田地荒歉只能保守

自己地方此次求免派兵等語又據該道等稟稱  
三稜谷原為恭順因近年內地不准下壩傭工積  
疑成懼此次官兵欲由彼境前進伊等惟恐乘勢  
襲取故有此稟<sub>臣</sub>等公同商酌土兵原不足恃現  
已攻破巴朗拉相距美諾不遠曾頭溝一路之兵  
得進固為有益非必藉此成功該上司等既懇求  
免出兵勉強派撥徒滋疑懼當即行知該道協等  
審度事機可止即止並令書令阿等速赴軍營合

力進剿又據茂州吏目王攸訓等稟稱本月十二日據州屬三齊寨頭人報有梭磨土司在路卡地方搽演又有土兵在納札習古二處搽演均離三寨十餘里其行為詭譎應預為防範等語臣等查該吏目都司來稟首列茂州知州陳奉茲之名而陳奉茲現在軍營管理鑄砲事務當即傳詢該州據稱知州現在軍營雖未悉該州近日番情但上年在州時訪察三稜谷情形均稱梭磨土婦卓爾

瑪係草布什咱之女與金川有隙在三土司中最  
為恭順當此大兵討叛指日奏凱之時該土婦何  
敢反有別情或係遠地愚番訛言相惡容知州赴  
田州境體訪實情等語臣等思梭磨土婦卓爾瑪  
於去年六月間小金川攻圍鄂克什時即帶領伊  
子搬至路卡地方居住令其頭人看守官寨是該  
土婦預移向內其恐被逆酋貽累情形已可概見  
該土婦前此既有情願出兵之語今又與從噶克

卓克采兩土司合詞懇免其意摠慮官兵辦理小金川或仍如前次大兵撤後伊等必受其荼毒狐疑不定實由於此至所稟校聚兵搃演之處臣等

詳察查禮五福及知州陳奉茲稟詞卓爾瑪移住路卡已非一日或帶領土兵往彼防身亦事之所  
有該吏目等稟報張皇似係傳聞之妄但夷情原  
難深信臣等當即派委熟悉該處情形之千總路  
連英同陳奉茲前往體察如見該土婦頭人等即為

明初曉諭一面行知查禮查明妥辦俟諭該員稟  
復到日另行具奏臣等審度情形四川邊外各土  
司積若居多被兩金川恐赫既久難其心不反為  
勾引皆因川省近年駕馭番居不能加以威信且  
於小金川以致各土司强者效尤弱者懷貳今幸  
蒙

聖明洞照務在掃穴殲渠臣等惟有竭盡心力速勦滅

小金川則各土司震懾兵威自消反側奏入

上諭軍機大臣曰溫福奏三稜谷土司求免挑派土兵一節已令查禮五福審度事機可止即止亦只可如此辦理其磨土兵在路卡納札習古三處揀演或果係該土婦帶兵自防抑或潛萌別情俱未可定今該州陳奉茲親往該處確查自可得其實情無難徐為妥辦此時總以攻勦小金川為急務如即將僧格桑擒獲正法則各土司自聞風畏懼不敢稍萌異志但三稜谷地方與曾頭溝最近而其距達木巴宗等處



亦不甚遠伊衆熟悉彼中山徑間道越險乃其常技  
已拉朗一路現有續調之兵以次繼進自無慮賊番  
之阻截但糧道臺站皆從此一路經行恐三襍谷之  
人或乘間潛出掠我糧運軍臺又復成何事體此則  
不可不防溫福等惟當派委明幹得力之員切實妥  
辦便可無虞別故至三襍谷情形總俟勦平小金川  
後查明分別辦理又另摺所奏善後各事宜及設鎮  
駐兵之處皆與朕節次所降諭旨相合亦俟軍務告

竣與桂林等妥議覆奏

丁卯

上諭軍機大臣曰昨溫福等奏俟將南北兩山賊衆全  
行洗盡即可攻取資哩等處可知資哩即在山口我  
兵若將南北山梁佔據自高處施放鎗礮向下攻打  
賊雖堅守亦斷無不得者又昨據五岱叅奏馬彪伍  
什哈達不遵號令遺誤事機而於溫福等會奏摺內  
又稱伍什哈達棄所佔山岡而回溫福即欲辦理伍

什哈達情願前往旋已奪回等語溫福等三人皆在一處而五岱叅奏馬彪等摺內並無溫福阿桂之名可知其彼此不睦現當進兵滅賊之時同事大臣若不和衷於事大有關係阿桂雖係提督要非他人可比既同溫福五岱聯名奏事難以諉為不知着傳旨詢問溫福阿桂時五岱所叅馬彪伍什哈達奏摺因何不列溫福阿桂之名令其明白回奏

同日

上又命軍機大臣曰五岱叅奏馬彪伍什哈達摺內容奏溫福自以為是不聽伊言以致衆兵寒心等語朕以溫福性躁一時不能改得資哩催促官兵前進以致衆寒心亦未可定至五岱曾從兆惠經歷西路軍營又授為都統叅贊或遂輕視溫福又或五岱竟有過失惟恐溫福叅奏故為先發制人之計烏拉齊之惡習如此均未可定在將軍叅贊理宜和衷共濟方可以任事圖功今若以五岱所叅之摺即寄溫福閱

看伊必轉滋疑惑是以五岱所奏夾片已經焚毀但  
溫福在軍營實在如何舉動從前訥親在金川時並  
未親臨戰陣坐守營盤是以將伊正法今溫福日與  
賊人交仗豈如當日訥親坐守營中任性迫促官兵  
乎阿桂雖係提督然是滿洲世僕且在軍機行走多  
年係朕加恩棄瑕錄用溫福所行之事五岱尚且奏  
及何以阿桂反不奏聞今五岱所奏彼此不和爭競  
其何以不睦之故著傳諭阿桂據實密奏看來二人

在一處於軍務大為無益不如派五岱隨在桂林隊內亦可將此一併密諭阿桂作速據實覆奏

同日桂林奏言查噶爾金前面東山梁形勢險峻兩山環抱轉過山梁即距達烏不遠賊番悉衆固守而於甲木翻山小路復經添兵防禦并屢次乘夜潛來臣分派官兵暗藏各隘以防偷劫仍督率侍衛鎮將等於十四十五等日架礮轟推迎面賊礮漸見殘毀十五日戌刻賊番復由噶爾金後山

梁緣崖繞道而下潛襲大營我兵先伏山邊溝內  
讓過賊番即放鳥鎗斷其去路官兵又自營中衝  
出前後夾攻賊番驚竄我兵分頭截殺殲斃五千  
餘人尚有竄逃不及滾崖跌斃者自此失利知有  
准脩雖夜間仍於噶爾金前面及扎哇窠後山等  
處不時滋擾究不過數十名擲石放鎗意圖疲我  
兵力亦經當時擊退茲於十六日威寧鎮總兵王  
萬邦先帶領二起兵一千馳抵軍營當即合兵攻

剿自十六至十八等日奮力攻打賊番堅守不出  
臣思東山梁地居要隘必須過此方能直抵達烏  
今無別路可通賊復于碛內藏匿彼此相持徒稽  
時日隨于十九日派兵并力仰攻直取山梁碛卡  
搶獲山邊賊卡三座殺死賊十一名因山徑陡險  
賊人據高臨下鎗石如雨自辰至申未能攻克恐  
致死損多人先將石卡佔據暫行存劄  
臣復密差  
員弁並帶約練土兵分踞路徑如有可以繞截之



處較之力取實為捷便其隨後三四起點兵一千  
名約二十一二日即可到齊臣現在督率將備等  
上緊用礮轟擊務在克此前進奏入

上諭軍機大臣曰據桂林奏連日攻勦噶爾金前面山  
梁情形并于夜間設伏擊敗偷營賊眾及跣探路徑  
繞越碉卡各情形所辦俱好賊番屢次乘夜潛來偷  
劫必係金川所為甚為可恨十五夜間截殺五十餘  
賊雖足稍挫其鋒使知警畏惜未能盡殲其眾即此

幫助小金川一節索諾木之罪斷不可少至索諾木  
既與僧格桑勾通一氣亦未必不防官兵之并為勦  
擊固無慮此時之預洩事機致賊酋知覺準備也現  
在溫福攻勦資哩已得其對面山梁所有資哩賊寨  
計日可破今桂林復覓間道進攻果能得其要隘  
兩路俱可乘勝直入攻勦美諾勢如破竹若即擒獲  
僧格桑處以極刑則諸番自然震懾軍務即可告戢  
但恐逆酋逃入金川而索諾木竟敢負隅抗命勢不

得不移兵征勦現在陝甘貴州等省續調添調之兵  
俱陸續到營惟覺滿洲兵太少朕意或將預派之京  
兵二千即令起程前往自為得濟但派遣京兵即使  
兼程遄進此時亦不能遲至軍營供現在攻勦之用  
且京兵行動聲勢甚大以此朕心尚未能遽定況用  
兵之事實非朕本懷不特金川險僻不欲窮兵黷武即  
辦理小金川一節朕初意即不肯加兵是以于阿爾  
泰格外矜原若其誤全出于阿爾泰一人之意則與

向年訥親之憤事何異是阿爾泰早經正法又豈能  
僅予罷斥旋復授為散秩大臣乎著將此詳諭溫福  
阿桂即將現在情形通盤籌畫若索諾木藏匿罪首  
又不退還侵地不可不聲罪致討即當奏請京兵過  
往合力勦擊俟伊等覆奏到日以定行止

同日

上又諭軍機大臣曰前據溫福等奏攻打資哩現在佔  
住北面山梁盡力攻擊距今又六七日尚未將曾否

攻得情形奏聞官兵自十二月二十九日攻圍資哩  
以來已經一月有餘該處為賊人門戶自必悉力拒  
守今日久未能攻克恐不免師老氣沮于軍務殊非  
所宜昨閱小金川投誠之布爾佳供詞內有在木關  
壩居住若官兵攻過資哩一到木關壩全家都活不  
成之語查圖內有木南壩似即木關壩之轉音其地  
與達木巴宗不過一水之隔距美諾亦不甚遠朕意  
若一面圍困資哩一面分兵竟取木南壩若一至木

南壩即已遠出資哩之後兩面夾擊賊衆勢將自潰而美諾賊巢亦更無可阻距較之攻勦資哩正面冒險撲礮者勞逸懸殊如其資哩之賊出而救護正可盡力截殺俾無噍類至圖內木南壩尚係鄂克什地界今土司色達克拉兄弟俱隨在軍營其路徑皆所熟悉即用伊等為鄉導自屬妥便著傳諭溫福即行相機妥辦


同日桂林又奏言竊

臣

奉到

諭旨查小金川與金川境壤本屬毗連道路又復叢雜  
可通之處甚多其僧格宗亦係經由之一路僧格  
桑勢處窮蹙諒必乘間潛逃臣現在攻取東山梁  
碉卡即於所得卡了甲木等處附近山徑無不加  
意嚴防不使覓渠漏網指日統兵前進直趨僧格  
宗地方則該處尤為緊要即當預為密布凡遇幽僻  
之所及我兵可到之處預行分頭堵截時刻稽查  
務在擒縛逆酋早加顯戮以正

國法而快人心斷不敢稍有踈虞致賊兔脫奏入報  
聞



平定兩金川方畧卷十八



欽定四庫全書

史部

平定兩金川方略卷

十九至  
二十一

員外郎<sub>臣</sub>顧宗泰覆勘

總校官原任侍講<sub>臣</sub>王燕緒

欽定四庫全書

平定兩金川方略卷十九

二月戊辰

上諭軍機大臣曰五岱寨寨內有溫福自以為是不聽伊言頗  
寒官兵之心等語朕謂將軍參贊在營辦事必彼此一心方於  
軍務有益今聞五岱所奏則已露彼此不睦之意朕已將其摺  
片焚毀並降旨詢問阿桂然朕徹夜思惟倘溫福知之轉生疑  
懼論溫福五岱阿桂三人朕自信用溫福無反信用五岱阿桂之

理即如前日溫福等奏摺遞到朕先為閱看因其辦理烏什哈達頗為過當朕即以過當批之後始閱五岱奏摺非因五岱之言也總因溫福平素口吃姓又急躁一時不能即破資哩其心更增煩躁所以急欲嚴辦烏什哈達由此可以想見其性情矣然溫福身任勦賊其煩躁固宜即五岱阿桂亦豈有不煩躁之理此尚非溫福之過其曲自在五岱若使溫福亦如當日訥親在軍時偷安退縮從不一至接仗之地但知嚴促兵丁進攻則不但五岱應行叅奏即阿桂亦當聲明其故一同叅奏朕昨日

密寄阿桂諭旨竟不必機密即令溫福五岱阿桂同看或果係溫福性暴蔑視五岱致寒將士之心溫福即當改悔從前之失朕意五岱在軍營較之溫福更多歷練或因一時攻取資哩悉溫福委罪於伊乃以此密奏為先發制人之計其欲自佔地步已屬顯然著溫福五岱阿桂據實奏聞朕辦理庶務一秉至公從無偏倚如此反覆申諭者正以伊等皆受朕重恩且當軍旅要務若彼此生釁必至誤朕大事至於此等瑣細朕亦不加深究著傳諭伊等各自屏去嫌疑合心共濟遠戍勦滅逆首以慰

懸望

甲戌桂林奏言臣查噶爾金之後山梁賊番屯踞恃險憑高因見我兵勢難繞越不時乘夜潛來俱經我兵殺退隨於二十三日夜密派脩弁等帶領兵練潛由甲木下溝攀援而上山梁復飭侍衛將領等分領官兵暗伏於噶爾金山下聽見山上鎗響奮力仰攻我兵於二十四日丑時全到施放排鎗奮力衝殺賊番驚惶無措甫欲開鎗抗拒復聞我兵由噶爾金納喊上山上下夾擊當即奔竄除滾崖逃脫外殲戮賊

番六十四名奪獲大小石卡四十餘處其噶爾金前面之東  
山梁形勢險峻下臨大河懸崖陡立無路可通前經佔得石  
卡其石卡以前山凹內列有碉卡數座地名邦科與石卡相  
近碉內賊番放鎗拒守若不先行攻奪我兵難以存住隨將  
礮位移至石卡連日轟擊賊人堅守不出二十五日賊碉將  
次殘毀隨即督率兵練奮勇直前別派兵丁攜帶火彈賊番  
於碉卡內放鎗拒敵經放火之兵乘間搶至碉下於破缺處  
拋入火彈立時火起賊番驚潰我兵追殺一齊竄入樹林為

東山梁賊衆救應上山共斃賊番十五六名攻獲碉房石卡

二十餘處

臣

查噶爾金後山梁之後係墨壘溝山嶺聞該處

有小路可通達烏其東山梁山勢陡險碉卡亦多且樹林叢

雜俱有金川番衆潛屯防守若僅在此處盡力仰攻地險人

多未免有稽時日

臣

與鎮將等悉心籌酌仍一面上緊攻奪

東面山梁俾賊番悉力固守一面設法渡河襲攻陽岸阿仰

地方又揀派員弁兵練裹帶乾糧於噶爾金後山梁赴墨壘

溝山嶺潛行進取若能於此處覓路直抵達烏則東山梁阿

仰二處俱在我兵抄截之內賊番勢必中潰於進勦機宜實為迅速奏入

上諭曰一切皆合機宜佇俟大捷喜音

同日桂林又奏言臣前次攻獲卡了碉寨仰蒙

飭詢情形伏查口外番夷並無房屋均係住居碉樓隨處有之或少或多各成寨落棲身於此拒敵亦於此原非於官兵經歷之處始行修立其碉房設有鎗眼高下俱可放鎗每碉祇須數人防守我兵便難經過卡了原係小金川緊要之所相聚



而居所有碉房俱屬舊有之物各碉賊番本衆因調住他處只留二百餘人於路口要隘之碉悉力抵禦是以碉數多賊數較少奏入報

聞

乙亥溫福阿桂奏言據查禮稟三雜谷土司中惟梭磨最近內地土婦卓爾瑪頗知大義尚為恭順前因小金川遣人至彼誑以

天朝有發兵攻討三雜谷之語以致該土司等心生疑懼隨明白

剴切示以利害破其疑衆該土婦遣其頭目叩見脩述感激  
之情不敢稍滋疑貳察其詞氣似出至誠等語復據該處都  
司邢天培等稟稱都司聞拔磨土兵在路卡等處聚集撒演  
隨往該處確查當有拔磨頭目塔爾格古等前來稟稱我土  
司世受

國恩歷來恭順特因僧格桑傳說大兵要來攻討土司恐懼令頭  
人在路卡納扎等處防守都司諭以小金川不法是以大兵  
進勦指日掃除至爾土司素稱守法宜肯無端攻討小金川

欺誑之語切不可聽該頭人等聞之業已散去臣等奏入報

聞

同日溫福阿桂又奏言臣等查閱資哩碉寨石牆甚厚牆上均有出鎗孔穴又於地下創溝藏匿我兵攻撲賊即于孔穴內放鎗抵拒其寨北一箭之地有大石卡一座創有地溝可通寨內石卡之北連起五座石卡而對面高峰突起處又有大石卡一座我兵進攻賊即于高峰大卡內向下放鎗援助臣等會商必須一面上攻高峰大卡一面下奪寨北之卡掣

其各處援助之力資哩賊寨始可望其攻克臣等於本月二十四日子刻飭令巴圖爾侍衛佛倫泰等領兵衝入寨北卡內合力攻勦將卡內二百餘賊殲殺四十餘名擒獲十二名奪取刀鎗等物無數其由地溝藏匿者窘迫跳出為堵截之巴圖魯侍衛阿爾蘇納等盡數截殺隨即進攻碉寨賊衆仍於牆內放鎗自早至午竟不能逼近且恐傷損多人是以暫令撤兵仍放大礮轟擊此次攻卡千提趙全柱陣亡其餘兵丁亦有陣亡受傷者臣等查賊寨內貯糧其多寨西牆下又

有水泉我兵不能絕其飲汲是以死守抗禦其寨北對面山頂雖經侍衛烏什哈達奪回據守但山頂下峻險之處賊衆早已佔據起造大卡一座又起小卡五座直接山下大礮且于空際之處疊砌石牆以便藏身互相援救至我兵所佔山頂相拒賊卡中隔一溝必須下溝復上始能攻取現在五岱帶兵四千有餘除據北山山脊之外餘俱攻擊高峯突起之卡臣等又送五岱大礮以資轟打臣處大礮亦準對高山轟擊俟五岱攻克大卡臣等即督兵直攻碉寨務期必克至

從前攻取之南山德壘角寨後又有大山一座山脊蜿蜒而  
下直出資哩寨後至鄂克什官寨前之阿喀木雅賊衆據  
此大山由山梁以至阿喀木雅俱有石卡接連守禦若非據  
此大山賊番從高處下攻我圍困資哩之兵不能安穩且又  
塞我進兵之路臣等於二十五日派巴圖魯侍衛三達爾等  
帶兵八百名乘夜登陟奪佔山脊次日賊來衝奪我兵擲石  
放鎗擊斃賊人無數二十七日臣等又派兵一千名會合三  
達爾等佔住山脊之上於二十八日卯時由山脊往下攻壓

連克賊人所立三卡殲賊甚多至第四卡地勢甚窄賊卡又築於隔溝高嶺之上現在設法攻勦若此山脊各卡全數克獲則我兵可以進攻阿喀木雅而資哩亦必不支奏入

上諭內閣曰溫福等帶兵攻取碉卡千總趙全柱力戰陣亡甚為可憫趙全柱著照守備之例加恩優恤其餘受傷陣亡官兵著溫福等查明造冊送部照例議卹

上又諭軍機大臣曰溫福阿桂等奏連日官兵攻勦殲賊甚多如我兵得進阿喀木雅則資哩賊人即勢難

存聚等語籌畫甚是據現所奏情形似無慮賊番自  
後掩襲惟當鼓勵官兵奮勇前進但當此險要之地  
若惟促令官兵攻取轉致多損兵丁於情事反無所  
益是當謀出萬全即稍稽時日亦無關係再所稱攻  
得阿喀木雅則資哩賊人即難佔據是阿喀木雅係  
南北兩山之要路得此即可摧滅資哩直攻美諾矣  
倘既攻克阿喀木雅而資哩賊人仍然死守一時難以  
攻得則酌量駐兵牽綴溫福等即帶兵直進美諾可



欽定四庫全書

平定兩金川方略  
卷十九

否如此辦理其悉心籌畫行之再朕因奏事之便屢降諭旨者原以增益在事諸臣之智慮但軍行萬里變態多端一時情形難以懸度溫福等但當相度事機惟冀有濟於事又不可拘泥朕旨現在彼處情形如何迅速具奏竚俟好音

臣等謹按軍營勝算悉由

睿畧乃猶慮懸揣之情未必盡該變態復

諭以量度情形惟期有濟不在拘泥成命蓋虛受之懷

實為曠古所罕有臣等伏讀謙卦之上九至於  
利用行師征邑國仰惟我

皇上開誠布公謙以受益正所謂有大而能謙必豫是  
以氛祲旋消而嘉祥懋集也

上又命軍機大臣曰今日閱溫福阿桂奏摺不列五岱  
之銜朕疑五岱接仗時或有挫失及細閱摺內則仍  
有五岱之名前因五岱單銜奏事朕謂將軍叅贊彼  
此不和必因五岱自恃軍營歷練又以朕用為都統

欽定四庫全書

平定回疆方略  
卷十九

九

叅贊遂生狂妄或因溫福目無五岱至於不睦已降一  
旨令伊等據實覆奏矣今觀此摺是非關五岱之故  
必溫福阿桂以五岱是烏拉齊人因藐視之夫朕用  
五岱原以其久歷軍營欲其於營間出力至於信任  
大臣以圖集事豈有舍溫福阿桂反信五岱之理溫  
福阿桂皆係滿洲世僕且為朕任用舊人若如此居  
心是其識見與五岱相等矣數年以來朕留心察看  
將軍大臣徃徃如是夫朕用一人將軍等即當體朕

之心諸事含容冀服其心而得其力豈宜好生枝節  
轉開釁隙之端溫福現任將軍且加恩至大學士更  
應度量含宏隨材器使使人心翕附將士效命不應  
居心如此著傳諭令其改悔以收羣策之益

己卯桂林奏言臣於正月二十八九等日督兵攻打  
東山梁賊人憑高固守而對面阿仰地方沿河俱  
設有卡隘難以暗渡因於二月初一日令總兵宋  
元俊王萬邦同侍衛將脩等仍悉力攻奪山梁飭

派叅將薛琮暨脩弁等帶領川黔兵練二千餘名  
同土兵引路裹糧前進於是日申刻進發一由甲  
木翻山一由新得噶爾金後山梁繞道俱潛赴墨  
壟溝山嶺不但可以覓路進抵達烏井可繞出東  
山梁之後從上壓取臣等自下仰攻上下夾擊便  
可得手我兵緣崖越嶺至初二日子刻到齊而賊  
人於山脊要路設立木城石卡防守甚堅我兵突至  
奮攻賊人正在放鎗相拒忽有兵練數名乘勢躍

至木城拋擲火彈賊衆驚惶棄城奔逸將木城燒燬乘勝追殺前面賊番見木城火起大兵勢盛有高處放鎗對仗者有望風先行驚潰者大兵合力攻殺沿路木城賊卡隨得隨佔追至半山兩峯壁立中通一徑盤互陡險僅容一人魚之冰雪未消勢須攀援魚貫而上賊於崖山卡內拒守鎗石亂下我兵迎面受傷難以前進自己至酉天復微雨併力攻取未能驟過因飭令薛琮等一面攻打一

面暫於該處帶兵七扎先行佔據大水城四座石  
卡二十一處共斃賊番四十六名臣查東山梁及  
墨壟溝山嶺均距達烏不遠而達烏係至美諾緊  
要之所今見大兵深入自必悉力保守且我兵每  
攻獲一處賊番即退守一處所得之地愈多則所  
聚之賊愈衆加以金川助力賊勢倍增踞險藏身  
井不明為對仗其東山梁勢居險峻連日攻打該  
賊番於山嶺施放鎗礮推滾大石全力拒阻臣目

擊情形實為憤恨現在率同宋元俊王萬邦等  
晝夜攻擊東山梁務期必得仍督促薛琮等上緊  
攻取墨壘溝山嶺雖路徑險仄務須設法攻開取  
道抄截直抵達烏奏入

上諭曰自當督飭官兵鼓勇向前亦應愛惜兵力勉為  
之一切佇俟捷音

癸未溫福桂林奏言臣等前以資哩寨賊人併力  
死守急切未能攻破擬俟陝甘兵到探覓間道分



兵兩路一由本布爾桑岡前進一由色布色爾前進今查色布色爾一路官兵尚未能直抵鄂克什舊寨現在資哩北山峯頂駐扎冲壓山坡以下至資哩寨外各卡之賊連日打仗未能得手至臣等晝夜督率官兵攻打賊寨所有碉樓俱已被礮摧毀尚存碉根石牆丈餘壓傷賊衆亦為不少而賊匪仍潛匿地溝不出至本布爾桑岡一路亦應分兵進勦惟是臣等一路雖有兵幾及一萬而現在

南山梁去兵三千數百名北山梁去兵四千數百  
名其留在軍營攻圍資哩之兵不過二千南北兩  
山地勢險要又延袤各有七八十里官兵分布實  
難抽撤所有續調之甘涼兵一千名據軍需局續  
報改由廣元入川臣等因思兩路軍營原無分別  
南路既急須添兵力而甘涼兵又改由廣元行走  
自應令其速赴南路臣等原擬本布爾桑岡一路  
此時竟無可撥之兵臣等惟有竭力設法督辦將南

北山各卡之賊勦殺無餘則資哩斷難支守奏

入

上諭軍機大臣曰溫福等連日用礮進攻資哩摧毀  
石礮而賊人藏入地溝死守等語朕意用礮從平  
處施放必至穿過若從高處向下賊即藏匿地溝  
亦難匿避今溫福等打毀石礮僅餘丈許石牆吾  
兵或做木架占高處施放或推土牛往下則賊巢  
無不摧毀之理想伊等帶兵數千製造木架及

堆礮臺亦復不難溫福等何不一念及此再溫福等  
現在攻取資哩大寨乃賊人要路悉力死守一時不  
能攻取尚屬常事至五岱牛天界帶兵攻取南北山  
梁兩傍山梁之賊諒不甚多至今一月有餘何以不  
能攻取五岱經歷行陣非他人可比看來伊等並不  
加緊出力着傳諭五岱並令五福傳諭牛天界一同  
明白回奏至安設駐防兵丁事此時斷不可洩露使  
已旺布拉克底之人聞之或生疑懼俟擒獲僧格桑

後再籌辦可也

同日溫福阿桂又奏言竊臣等現在兩路官兵攻  
勦之資哩僧格宗俱係小金川要隘金川助惡之  
兵由何路來赴賊巢誠不可不訪問明確預為伏  
兵堵截臣等前獲金川賊犯沙拉據稱到美諾後  
見過僧格桑遣赴資哩南山梁等語又據脫出之  
鄂克什番民章喀爾等供稱該番所往來章寨在  
僧宗之南約有半日路程從來章南至金川所屬

之克舟九寨有一日路程克舟離噶拉依不遠此  
次金川助兵從克舟至來章從來章至僧格宗再  
抵美諾又稱金川從巴旺布拉克底邊界上墨爾  
多山亦可以通小金川等語臣等詳加體察兩金  
川境壤相接其間山箐叢雜小徑原多而賊兵現  
從克舟來章行走自為正路其所稱墨爾多山亦  
必有路可通但查各該處均在美諾西南臣等兵  
行經過各處尚在美諾東北是以現攻之資哩雖

係小金川賊酋緊要門戶併力死守之地而金川  
助惡之兵自西而來臣等此路官兵未抵美諾以  
前實無越過賊巢阻遏逆酋逃竄之路總俟攻抵  
美諾即當訪查章喀爾所供兩路及此外可通小  
徑分兵嚴行防範奏入報

聞

同日溫福阿桂又奏言竊臣疊奉

諭旨以賊匪狡惡大兵深入後路不可不防查臣等自

巴朗拉進勦所有卧龍關內外軍臺餉道及要隘處所業酌留官兵自二三十名至五六十名不等及攻破巴朗拉進抵達木巴宗又攻得斯底葉安進抵資哩因巴服拉達木巴宗等處尤關緊要酌派將領帶兵數百名在彼防守是時因軍營現有總兵三員內昭通政馬彪由北山進兵川北鎮牛天昇由南山進兵而重慶鎮和邦額又隨營經管火藥鉛丸各帶軍械收發承辦各事官是以僅令



遊擊等員防範後路令陝甘總兵書明阿張大經  
先後抵營足敷調遣而已朗拉等處領兵防守稽  
察軍臺餉道恐該遊擊等日久不無疎懈查總兵  
和邦額在川頗久邊外情形尚能諳悉令其即赴  
已朗拉一帶統領官兵駐扎來往巡查各該處既  
有大員經理彈壓自可不致疎虞其原派兵數亦  
無須更議加增至和邦額經手各事須另行委員  
接辦以專責成查董天弼現在隨營効力該員於

軍營一切事務尚屬經練應即令其接管奏入  
報

聞

同日溫福阿桂又奏言本月初六日據五岱遣副  
護軍校富爾賽持送小金川番稟前來詢其如何  
得有番稟係小金川遣賊番在卡外屢次叫喚懇  
求說話經五岱派土練一名往問據賊番稱我土  
司有稟呈上將軍大人還求賞給回文等情

目等

即令通事大臣譯出逆酋何敢任意狂吠總以與  
鄂克什有仇其現在所守地方係上年大人們斷  
給為詞悖妄已極實為可惡可恨當即嚴加斥詈  
以褫狂豎之魄但臣等體察情形此稟明係僧格  
桑見兩路攻打計窮力盡惟恐番衆一時潰散藉  
投稟之名以暫時安撫衆人之心且妄冀與回論  
既可窺測我軍情事或并可稍緩湏更攻勦更不  
宜墮其狡計查上年十一月間臣等在山神溝接

澤旺出名所具之稟當即給與回檄令其縛獻逆  
子親詣投誠或可開一綫生路彼時官兵未集且  
尚未與賊接仗故稍寬其詞使賊八父子離心上  
下解體或可不煩兵力擒戮亮酋今賊酋敗於節  
節抗拒且現已攻破險隘深入至此不日當抵賊巢  
今昔機宜已屬不同即使僧格桑自縛來投尚無  
宥死之理況此狂妄言實不值更給回檄反為賊  
匪所輕且查從前所給檄文僧格桑皆不使伊父

得知而於衆人之前轉稱大兵進勦不是為我一  
人要將番人盡行誅戮之語以堅其死守之心節  
據逸出番民供吐相同此次若被逆酋誑得回諭  
又將借此以施其鬼域伎倆於事亦為無益目等  
再四熟籌竟不給與回文惟有奮力迅速進攻掃  
穴擒渠使逆酋不得稍有縱逸謹將譯出漢字及  
逆酋原稟一併進呈

御覽奏入報

聞

同日溫福阿桂又奏言查小金川賊衆惟恃石礮石卡以為抵禦故大礮轟摧最為得力前飭軍雷局辦銅運至軍營以資鑄造之用年前節次收到銅觔鑄成礮位頗為適用但因山路崎嶇碍難抬送所鑄各砲皆在千觔以內擊打堅礮未免稍稽時日今臣等另鑄三千餘觔大礮期於迅速攻破乃查正月以來軍需局所運之銅質地不淨多有

礦性勉強融鑄隨打隨裂竟為無用臣等正在籌畫間適建昌道白瀛來營據稱該道所駐雅州地方亦有銅觔可以趕辦隨於本月初一日飛差前往今於初八日已運到七千觔臣等查驗銅質及詢之工匠人等皆稱較高於舊銅實足以供鼓鑄臣等現飭連夜趕造數日內即可鑄成比之舊日礮位摧擊自為加倍得力至此項無用之銅共計一萬餘觔是否係省城舊存之銅抑係軍需局另

委州縣官辦運臣等未知詳細現已飭令該局確  
查何人承辦仍飭原辦之員自行運回所有運費  
價脚不准開銷以示懲儆奏入報

聞



平定兩金川方略卷十九